

Odluka kojom donosi Zakon o izmjenama i dopunama Zakona u unutrašnjim poslovima Sarajevskog kantona

Koristeći se ovlaštenjima koja su Visokom predstavniku povjerena u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik "pomaže, kada Visoki predstavnik to ocijeni neophodnim, u rješavanju svih problema koji se pojave u vezi sa implementacijom civilnog dijela Mirovnog ugovora";

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za navedene probleme "donošenjem obavezujućih odluka, kada to ocijeni neophodnim", o određenim pitanjima, uključujući i (prema tački (c) stava XI.2) mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta;

Imajući u vidu član I (1) Aneksa 11. Općeg okvirnog sporazuma za mir u Bosni i Hercegovini, kojim se predviđa da će strane "na područjima pod svojom jurisdikcijom svim osobama osigurati bezbjedno okruženje time što će osigurati da organi za

provođenje zakona rade u skladu sa međunarodno priznatim standardima i uz poštivanje međunarodno priznatih ljudskih prava i osnovnih sloboda ...”;

Uzimajući u obzir da, u skladu sa navedenim članom I(1) Aneksa 11, postoji potreba za jačanjem institucionalnog integriteta organa za provođenje zakona prema najvišim evropskim standardima;

Vodeći računa o potrebi za realizacijom Projekta analize sistema koji provodi Misija Ujedinjenih naroda u Bosni i Hercegovini, čija je svrha da uskladi strukture i ključne aspekte provođenja zakona u cijeloj Bosni i Hercegovini, a naročito preporuka o osnovnim standardima za demokratsko obavljanje policijskih poslova koje proizilaze iz systemske analize policije Sarajevskog kantona.

Uzimajući u obzir i razmotrivši sva gore navedena pitanja, Visoki predstavnik donosi slijedeću

ODLUKU

kojom donosi *Zakon o izmjenama i dopunama Zakona u unutrašnjim poslovima Sarajevskog kantona* (Službene novine Sarajevskog kantona, broj 9/96, 13/99, 14/00, 22/00 i 15/02), kako se dalje u tekstu utvrđuje.

Ova Odluka stupa na snagu odmah i odmah se objavljuje u “Službenim novinama Sarajevskog kantona”.

Navedeni *Zakon o izmjenama i dopunama*, koji je sastavni dio ove Odluke, stupa na snagu u skladu sa odredbom člana 25. na privremenoj osnovi dok ga Kantonalna skupština ne usvoji u istom obliku, bez izmjena i dopuna i postavljanja bilo kakvih uvjeta.

Sarajevo, 6. decembar 2002. godine

Paddy Ashdown

Visoki predstavnik

**ZAKON O IZMJENAMA I DOPUNAMA ZAKONA O UNUTRAŠNjim POSLOVIMA
SARAJEVSKOG KANTONA**

Član 1.

U članu 2. stav 1. tačka 5. mijenja se i glasi:

“Poslovi i zadaci u vezi sa: nabavkom, posjedovanjem i nošenjem oružja i municije”,

U članu 2. stav 1. dodaje se nova tačka 6. koja glasi:

“Poslovi i zadaci u vezi sa: održavanjem javnih skupova, ličnim kartama, ličnim imenima, prijavama prebivališta i boravišta, jedinstvenim matičnim brojem građana, matičnom knjigom rođenih, vjenčanih i umrlih, registracijom motornih vozila, vozačkim ispitima i izdavanjem vozačkih dozvola, i kretanjem i boravkom stranaca i izdavanjem putnih isprava.”

Član 2 .

U članu 5. stav 2. riječi “i uređuje način njihovog osiguranja” brišu se i zamjenjuju riječima “a na koji način će ta zaštita biti pružena odlučuje komesar Policije”.

Član 3.

U članu 6. riječi “službenici Ministarstva, a naročito” brišu se.

Član 4.

U članu 9. stav 2. u prvom dijelu prve rečenice, iza riječi “ministarstvo” dodaju se riječi:

“putem Uprave policije”.

Član 5.

Član 10. stav 2. mijenja se i glasi:

“Unutrašnje organizacione jedinice Ministarstva su Kabinet ministra, Uprava policije i Uprava za administraciju i podršku”.

U članu 10. dodaju se novi stavovi 3. i 4. i glase:

“Uprava policije je odgovorna za izvršavanje poslova i zadataka određenih članom 2. stav 1. tačke 1. do 5. ovog zakona.

Uprava za administraciju i podršku je odgovorna za poslove i zadatke iza nadležnosti Ministarstva osim poslova koje obavljaju Kabinet ministra i Uprava policije.”

Član 6.

Član 11. stavovi 1. i 2. mijenjaju se i glase:

“Policijska uprava će se formirati unutar Kantona i biće odgovorna za služenje jedne ili više općina”.

“Policijska uprava ima jednu ili više policijskih stanica”.

Član 7.

U članu 12. stav 1. tačka 8. se briše.

U članu 12. stav 1. tačka 9. riječi “policije i drugih” se brišu.

U članu 12. tačka koja počinje riječima “sarađuje sa bilo kojom nezavisnom komisijom...” mijenja se i glasi:

“Sarađuje sa i dostavlja Uredu za pritužbe javnosti u Ministarstvu unutrašnjih poslova, uz nadzor od strane Nadzorne komisije koju formiraju kantonalna Vlada i kantonalna Skupština, sve dokumente vezano za navode o neprimjerenom ponašanju službenika Ministarstva. Takođe daje na raspolaganje osoblje za saslušanje i pružanje pomoći kada za to postoji potreba.”

Član 8.

Član 15. stav 1. mijenja se i glasi:

“Pravilnik o unutrašnjoj organizaciji i sistematizaciji Ministarstva donosi ministar, uz saglasnost Vlade Kantona, a na prijedlog:

- komesara Policije o odredbama vezanim za rad Policije
- direktora Uprave za administraciju i podršku kao i sekretara Ministarstva o svim ostalim odredbama vezanim za administrativna pitanja.”

Član 9.

Član 16. stav 1. se mijenja i glasi:

“Konstitutivni narodi i pripadnici Ostalih biće proporcionalno zastupljeni u Ministarstvu prema popisu stanovništva iz 1991. g. sve do potpune provedbe Aneksa 7. Općeg okvirnog sporazuma za mir kao i nakon toga, u skladu sa Ustavom Federacije Bosne i Hercegovine.”

Član 10.

U članu 17. stav 2. riječ “predsjednika” briše se.

U stavu 2. tačka 4. riječi “predsjednik Kantona” zamjenjuju se

riječima “Vladi Kantona”.

U stavu 2. tačka 11. iza prve riječi “uspostavlja”, dodaju se riječi “pod operativnom komandom komesara Policije”.

U stavu 2. tačka 12. riječi “predsjednik i “brišu se.

Član 11.

Član 18. mijenja se i glasi:

“U slučaju odsustva ministra ili nemogućnosti obavljanja dužnosti, zamjenjuje ga sekretar Ministarstva”.

Član 12.

Član 19. briše se.

Član 13.

Član 21. mijenja se i glasi:

“Pod sveouhvatnim nadzorom ministra unutrašnjih poslova, komesar Policije rukovodi svim policijskim operacijama u skladu sa Zakonom.

Komesar Policije rukovodi i nadzire sve policijske aktivnosti vezane za javnu sigurnost građana, sprečavanje i otkrivanje krivičnih djela.

Komesar Policije obavlja slijedeće zadatke:

(i) na dnevnoj osnovi planira, rukovodi i nadzire sve policijske aktivnosti;

(ii) neposredno rukovodi policijskim aktivnostima, a u vezi s tim organizira, planira, nadzire, usmjerava i koordinira rad Policije;

(iii) donosi odluke o zapošljavanju i raskidanju ugovora o zapošljavanju u skladu sa Zakonom i nakon konsultacija sa ministrom;

(iv) raspoređuje i premješta zaposlene na i sa odgovarajućih radnih mjesta u Upravi policije, i donosi odluke o rasporedu i premještanju. Prije donošenja odluke o raspoređivanju ili premještanju rukovodilaca u Upravi policije, komesar Policije će konsultirati ministra i sa pažnjom uzeti u razmatranje njegovo mišljenje;

(v) priprema prijedlog budžeta za potrebe Policije i odgovoran je za sva finansijska i materijalna sredstva dodijeljena Policiji;

(vi) priprema programe, informacije, analize, i ostale materijale iz djelokruga policijskog rada;

(vii) redovno informiše ministra o preduzetim policijskim aktivnostima;

(viii) nadgleda rad Jedinice za profesionalne standarde, koja se sastoji od unutrašnje disciplinske kontrole, unutrašnjih inspekcija i revizija, te razmatranja i razvoja načela.

Mandat komesara Policije traje četiri godine uz mogućnost produženja za još jedan dodatni mandat. Načelnik uniformisane policije zamjenjuje komesara Policije kada nije u mogućnosti da obavlja svoju funkciju i dok se ne odabere i postavi na dužnost novi komesar Policije u skladu sa Zakonom.

Član 14.

Član 22. stav 4. mijenja se i glasi:

“Kandidat za poziciju komesara Policije mora imati najmanje deset godina radnog iskustva u policiji na rukovodnim pozicijama (isključujući period od 1. marta 1992. do 14. decembra 1995.) i dokazanu sposobnost rukovođenja složenim poslovima. U smislu ovog zakona, “rukovodna pozicija u policiji” označava poziciju višeg inspektora ili višu. Uz to, isti će imati najmanje čin glavnog inspektora Policije i

zahtijeva se da je osoba u tom činu provela najmanje tri godine. Kandidati za mjesto komesara Policije kojima nije odobreno privremeno ovlaštenje ili autorizacija od UNIPTF neće biti uzeti u razmatranje.”

Član 15.

U članu 30. stav 1. riječi “boravak i kretanje stranaca” brišu se.

Član 16.

Član 32. stav 2. mijenja se i glasi:

“Zaposleni u Ministarstvu putem lanca komandovanja izvršavaju naredbe ministra, osim ako su te naredbe u suprotnosti sa Ustavom ili zakonima Bosne i Hercegovine, Federacije ili Kantona”.

Član 17.

U članu 33. iza stava 3. dodaje se novi stav se koji glasi:

“Ovlaštena službena lica u Ministarstvu će imati činove. Način na koji će se dodjeljivati i oduzimati činovi utvrđuje Vlada Kantona.”

U članu 33. stav 7. riječi “ili zamjenikom ministra” brišu se.

U članu 33. stav 8. mijenja se i glasi:

“Tekst zakletve utvrđuje Ministar na prijedlog komesara Policije”.

U članu 33. stav 9. riječi “ili zamjenikom ministra” brišu se.

Član 18.

U članu 40. stav 1. riječi “Ministarstvo, odnosno” brišu se.

Član 19.

U članu 58. stav 2. iza riječi “ministar” dodaju se riječi: “, putem pravilnika,”.

Član 20.

Iza člana 61. dodaje se novi član 61a. i glasi:

“Postupak za određivanje disciplinske i materijalne odgovornosti službenika Ministarstva utvrđuje se Pravilnikom o disciplinskoj i materijalnoj odgovornosti.”

Član 21.

Iza člana 61a, dodaje se novi član 61b, koji glasi:

“Ured za pritužbe javnosti osniva se unutar Ministarstva unutrašnjih poslova za praćenje i nadzor nad internim mehanizmom disciplinske odgovornosti u vezi navoda o neprimjerenom i neprofesionalnom ponašanju službenika Ministarstva. Dužnosti i odgovornosti Ureda uređuju Vlada Kantona.”

Član 22.

Član 63. stav 1. mijenja se i glasi:

“U slučaju potrebe za izvršavanjem neodložnih poslova i zadaka, prekid korištenja godišnjeg odmora službenika Ministarstva može odrediti komesar Policije za službenike u njegovoj nadležnosti, a za druge službenike ministar ili lice koje on ovlasti.”

Član 23.

Član 68. stav 2. mijenja se i glasi:

“Odluku o privremenoj suspenziji u skladu sa stavom 1. ovog člana donosi komesar Policije za službenike u njegovoj nadležnosti, a za druge uposlenike ministar ili lice koje on ovlasti.”

Član 24.

U članu 77. riječi "nakon konsultacija sa svojim zamjenikom" brišu se.

Član 25.

Ovaj zakon stupa na snagu 6. decembra 2002. god. i odmah se objavljuje u "Službenim novinama Sarajevskog kantona".